



REPUBLIKA E SHQIPËRISË
KUVENDI
KOMISIONI PËR SIGURINË KOMBËTARE

Tiranë më 01.03.2019
Dokument parlamentar

RAPORT
PËR PROJEKTLIGJIN

**“PËR RATIFIKIMIN E MARRËVESHJES, NDËRMJET PALËVE TË
KONVENTËS SË BASHKËPUNIMIT POLICOR PËR EVROPËN
JUGLINDORE, PËR SHKËMBIMIN E AUTOMATIZUAR TË TË DHËNAVE TË
ADN-SË, DAKTILOSKOPIKE DHE TË TË DHËNAVE TË REGJISTRIMIT TË
AUTOMJETEVE, DHE MARRËVESHJES SË SAJ ZBATUESE”**

HYRJE

Komisioni për Sigurinë Kombëtare, bazuar në nenet 32-36 të Rregullores së Kuvendit, në cilësinë e komisionit përgjegjës shqyrtoi në mbledhjen e datës 01.03.2018 në parim, nen për nen dhe në tërësi, projektligjin *“Për ratifikimin e marrëveshjes, ndërmjet palëve të Konventës së Bashkëpunimit Policor për Evropën Juglindore, për shkëmbimin e automatizuar të të dhënave të adn-së, daktiloskopike dhe të të dhënave të regjistrimit të automjeteve, dhe marrëveshjes së saj zbatuese”*.

Për të prezantuar projektligjin në komision ishin të pranishëm përfaqësues nga Ministria e Brendshme.

Relator i projektligjit u caktua zonja Elona Hoxha.

BAZA KUSHTETUESE E PROJEKTLIGJIT

Projektligji është në përputhje me nenet 78, 83, pika 1, dhe 121, të Kushtetutës, nenin 17 të ligjit nr.43/2016, “Për marrëveshjet ndërkombëtare në Republikën e Shqipërisë”, si dhe

në përputhje me “Traktatin e 27 Maj-it 2005, ndërmjet Mbretërisë së Belgjikës, Republikës Federale të Gjermanisë, Mbretërisë së Spanjës, Republikës Franceze, Dukatit të Madh të Luksemburgut, Mbretërisë së Holandës dhe Republikës së Austrisë, në përshpejtimin e bashkëpunimit ndërkufitar, veçanërisht në luftën kundër terrorizmit, krimit ndërkufitar dhe migrimit të paligjshëm”.

QËLLIMI, PËRMBAJTJA DHE RISITË E PROJEKTLIGJIT

Ky projektligj pritet të kontribuojë në rritjen e efektshmërisë së strukturave ligjzbatuese në zbulimin dhe identifikimin e personave të përfshirë në aktivitet kriminal, nëpërmjet aksesit në bazat e të dhënave të vendeve të tjera.

Projektligj përmban rregullat për shkëmbimin e automatizuar të të dhënave të ADN-së, të dhënave daktiloskopike dhe të dhënave të regjistrimit të automjeteve. Me anën e shkëmbimit automatik të të dhënave të ADN-së dhe daktiloskopike, Shqipërisë i krijohet mundësia që të shfrytëzojë 10 bazat e të dhënave të shteteve të tjera që do të bëhen palë të projektligjit, duke i dhënë akses që të kontrollojë profilet e ADN-së, shenjat daktiloskopike dhe të dhënat e regjistrimit të automjeteve, si të shtetasve shqiptarë ashtu dhe profilet e ADN-së të ngjarjeve kriminale të ndodhura në Shqipëri, me qëllim identifikimin *on-line* të personave që janë përfshirë në këtë aktivitet kriminal apo kanë ndryshuar të dhënat e tyre identifikuese, emër, mbiemër etj.

Për mbështetjen e zbatimit të transmetimit dhe krahasimit të të dhënave të ADN-së, të dhënave daktiloskopike dhe të dhënave të regjistrimit të automjeteve, palët përcaktojnë:

- *Dispozitat mbi kushtet dhe procedurat për transferimin e automatizuar të profileve të ADN-së, të dhënave daktiloskopike dhe të dhënave për regjistrimin e automjeteve.*
- *Dispozitat e nevojshme administrative dhe teknike, për zbatimin e shkëmbimit të automatizuar të të dhënave të ADN-së, të të dhënave daktiloskopike dhe të të dhënave të regjistrimit të automjeteve.*
- *Me qëllim ofrimin e të dhënave personale dhe informacioneve të tjera të lidhura me të dhënat e referencës, çdo palë do të caktojë një pikë kombëtare kontakti. Për të siguruar konfidencialitetin dhe integritetin e të dhënave që do të dërgohen te palët e tjera, do të merren të gjitha masat e nevojshme duke përfshirë dhe kriptimin e tyre.*
- *Për hetimin e veprave penale dhe për të ndihmuar në identifikimin e personave të humbur dhe mbetjeve njerëzore të paidentifikuara, palët me një pëlqim të përbashkët, nëpërmjet pikave të tyre kombëtare të kontaktit do të krahasojnë profilet e ADN-së, me të gjitha profilet e ADN-së të dosjeve të analizës së ADN-së kombëtare. Profilet do të ofrohen dhe do të krahasohen në një formë të automatizuar.*

• *Palët do të sigurojnë disponueshmërinë e të dhënave nga dosja për sistemet kombëtare të automatizuara të identifikimit të gjurmëve të gishtave, të përcaktuara për parandalimin dhe hetimin e veprave penale, si dhe për të ndihmuar në identifikimin e personave të humbur dhe të mbetjeve të paidentifikuara njerëzore. Të dhënat e referencës do të përfshijnë vetëm të dhënat daktiloskopike dhe një numër reference, duke mos ofruar asnjë të dhënë nga të cilat subjekti mund të identifikohet në mënyrë direkte.*

Ky projektligj nuk synon përafrim me *acquis* të Bashkimit Evropian, por zbatimi i kuadrit *Prum* do të mundësojë që Shqipëria të avancojë dukshëm në zbatimin e kapitullit 24 “Drejtësia, liria dhe siguria”.

EFEKTET FINANCIARE TË AKTIT

Në lidhje me kostot financiare, kosto shtesë duhet të planifikohen për implementimin e rrjetit të kriptuar TESTA që do të bëjë të mundur realizimin e sigurt të lidhjes fizike të dy sistemeve, atij CODIS dhe AFIS/APIS me sistemet respektive të të 10 shteteve anëtare të PCC SEE. Po kështu, kosto shtesë do të ketë dhe për shkëmbimin automatik të të dhënave të regjistrimit të automjeteve në sistemin EUCARIS.

Për sa i përket rrjetit TESTA, kostot e instalimit dhe mirëmbajtjes së këtij rrjeti do të varen nga sa institucione që lidhen me të. Rrjeti TESTA administrohet nga Komisioni Evropian dhe është një rrjet i sigurt dhe që ofron kriptim. Në vendet e BE-së përdoret për komunikimin e administratave dhe nga ministritë përgjegjëse për financat dhe drejtësinë.

PËRFUNDIM

Komisioni për Sigurinë Kombëtare, pasi e shqyrtoi projektligjin në parim, nen për nen dhe në tërësi, me votat e të gjithë anëtarëve të pranishëm në mbledhje e miratoi atë duke vlerësuar se:

- ***Në aspektin ligjor***, projektligji i propozuar është në përputhje me Kushtetutën dhe legjislacionin në fuqi.
- ***Në aspektin procedural***, projektligji është paraqitur në përputhje me Rregulloren e Kuvendit,

dhe vendosi t’ia kalojë për miratim seancës plenare.

Relator

Elona Hoxha

Kryetar

Ermonela (Felaj) VALIKAJ